

‘EUSKAL Y’ PROIEKTUA. Lakuak finantzatu du, baina deskontua Kupotik egin nahi du gero

Jaurlaritzak bere kabuz aterako du lehiaketara Irun-Zumarraga tartea

Espainiako Gobernua «geldi» dagoela ikusita erabaki du, «gehiago itxaroterik» ez dagoelakoan

Luis Karlos Garcia | GASTEIZ

EAJko kargudunek eta politikariek berretsi zuten atzo, Eusko Legebiltzarrean, Juan Jose Ibarretxe ordu batzuk lehenago Parisen aurreratu eta EGUNKARIAK atzoko alean jakinarazitakoa: Eusko Jaurlaritzak, iragan asteartean egindako bileran, erabaki zuen lehiaketara ateratzea Abiadura Handiko Trenaren (AHT) egitasmoaren Gipuzkoako zati ia osoa (Irundik Zumarragara), Espainiako Gobernuak «geldi-geldi» jarraitzen duela ikusita.

EGUNKARIAK albistea egiaztatu zuen atzo bai Lakuan (Garaio eta Herri Lanetako Sailean), baita Lehendakariaren ere. Azken horretako informazio iturriek azaldu zuten Eusko Jaurlaritzak erabakia hartua duela, «ezin baita gehiagorik itxaron», eta tartea lehiaketara aterako duela «diru atal propioekin», nahiz eta gero deskontu egiteko asmoa izan Espainiari pagatzen zaion Kupotik.

Era berean mintzatu ziren Garaio eta Herri Lanetako Saileko arduradunak atzo, Eusko Legebiltzarreko korridoreetan. Izan ere, Alvaro Amann sailburuak aitortu zuen «Gipuzkoako adarra» lehiaketara aterako dutela.

Adierazpenok egin zituen osoko bilkuran *Euskal Y* proiektuari buruz ari zirelarik. Eztabaidan parte hartu zuen Rafa Uriarren jeltzaleak: aipatutako lan ildoarekin bat egin, eta zera esan zuen hitzaldia amaitzeko: «Espainiako Gobernuak ez badu bere gain hartzen daukan erantzukizuna, Eusko Jaurlaritzak bere kabuz hasiko da».

IU-EBren jarrerari adi

Oro har, osoko bilkurak apenas ekarri zuen berritasunik. Uriarren eta EAJko Pablo Larrauri jakinarazi zuten Jaurlaritzak eta Espainiako Gobernuak iragan udan hitzartuta zeukatela «elkarlanerako akordioaren oinarria», proiektuaren tarteen ardura erdi bana hartzeko asmoz, prozesua bizkortu nahian. Dena dela, bi legebiltzarkideon arabera, Sustapen Ministerioak azken orduan adostasuna gauzatu gabe lagatzea erabaki zuen; iradoki zuten, arrazoi politikoen ondorioz.

Bestetik, IU-EBren jarrerak ere arreta erakarri zuen, EAJk eta EAJk aurkeztutako zuzenke-



RAUL BOGAJO / ARGAZKI PRESS

Kontzentrazioa egin zuten atzo AHT Gelditu! Elkarlaneko kideek, Jaurlaritzaren egoitzaren aurrean.

AHT Gelditu! Elkarlanak manifestaziora deitu du, «aurkako jarrera zabala» gizarteratzeko

L.K.G. | GASTEIZ

AHT Gelditu! Elkarlanak manifestaziora deitu du Tolosan (Gipuzkoa), otsailaren 1erako, «proiektuaren aurkako jarrera zabala» gizarteratzeko asmoz.

Gizarte mugimenduak, sindikatuak, udalerrak eta abar biltzen dituen koordinakundeko ordezkari Niko Moreno eta Mila Elorza prentsaurrekoan agertu ziren atzo, goizean, Eusko Jaurlaritzak Lakuan duen egoitzaren aurrean. Bertan, gainera, hogeitortu bilerak egin zuten, *AHT-rik ez! Sondeoak gelditu!* leloa zuen pankarta eskuan hartuta.

Elkarlanaren ustez, egitasmoa gelditzeko aldarriak «gizarte eragile anitzen atxiki-

mendua» dauka, eta, era berean, adibidez, Eusko Jaurlaritzaren barruan, proiektuak «desadostasunak» baino ez ditu erakarri: «Akordiorik ez dago ezta Eusko Jaurlaritzaren barruan ere».

AHT-ko azterketa geoteknikoekin gertatutakoak gizarte «gaitzespen» horren erakusgarri direla aipatu zuten. «Ontzat jotzen dugu azterketa lan geoteknikoak eragotzeko azken asteetan egiten ari den gizarte eta udal oposizioa», erantsi zuten.

Ildo horretan, Gipuzkoako hainbat udalek lanak egiteko baimenik eman ez izana azpimarratu zuten —hala jokatu dute Eskoriatza, Antzuola, Ezkio-Itsaso, Itsasondo, Tolosa, Hernialde, Anoeta, Zizurkil, Hernani, Astigarraga eta

Oiartzungo udalek—. Bestalde, eskertu egin zuten, baserriak eta lur jabe ugari ere lurak okupatu eta makinak sartzeko baimena ukatu dietelako enpresei.

«Gauzak hala, proiektuaren inguruko gizarte adostasun falta nabaria da, eta lan geoteknikoek arduratzen diren enpresek bere ere onartu dute egoera honen erabateko anormaltasuna», ondorioztatu zuten.

Orobat, Elkarlanak gogor jo zuen garai batean kide izan zuen baina Eusko Jaurlaritzaren denetik «desagertuz» joandako IU-EBren kontra. AHTren proiektua geldiarazteko borrokan «erabateko utzikeria» agertzea leporatu zion. IU-EBk jarrera «zuzendu» beharra daukala uste du.

taz besteko ekimena defendatu baitzuen Oskar Matutek, *Euskal U* proiektuaren alde. IU-EBk ez zuen babestu bere gobernukideen testua, eta, hala ere, EAJ eta EA garaile gertatu ziren —Sozialista Abertzaleek ez zuten parte hartu bozketan—.

Eztabaidan, Matutek SAko Antton Morcillori aurpegiratu zion ezker abertzaleak ez duela udalerrietan «ahal adina» egin AHTren proiektua geldiarazteko. Morcillok gogora ekarri zion Euskal Herritarrok taldeak Jaurlaritzari babesa eman zion

aroan lortu zuela «proiektua benetan geldiaraztea, eta ez orain IU-EBk marketin operazio batez irudikatu nahi duena». «Guk esaten duguna egiten dugu, eta egiten duguna esaten dugu», gaineratu zuen Morcillok.

OSASUNA

Bizitza artifizialki ez luzatzeko nahia adierazi ahal izango dute gaixoeak

Efe | GASTEIZ

Eusko Legebiltzarrak Aurrez Adierazitako Borondatearen Legea onartu du. Legeari esker, Arabako, Bizkaiko eta Gipuzkoako herritarrek bizitza modu artifizialean ez luzatzeko nahia idatziz utzi ahal izango dute, bizi-testamentuan.

EAJren, PSE-EEren, EAren, Sozialista Abertzaleen eta EB-IU alderdien aldeko botoekin onartu zuten atzo legea. PPK, berriz, testuaren zati baten alde bozkatu zuen.

Legearen arabera, «adine nagusi den edonork idatzi ahal izango ditu bere bizi-nahiak eta tratamenduari buruzko zehaztapenak». Medikuntza taldeak aintzat hartu beharko ditu horiek gaixoa bere borondatea adierazteko gai ez denean.

Bizi-testamentu hori edozein unetan aldatzeko aukera izango dute herritarrek, epaileak horretarako gai direla dioen bitartean. Hurrengo urte amaierarako, bizi-testamentuen erregistroa sortzeko asmoa dute.

Alderdiak «pozik» legearekin

Gabriel Inclan Eusko Jaurlaritzako Osasun sailburuak zehaztu duenez, legeak ez du jasotzen «eutanasia aktiboaren aukearirik».

Bestalde, PPko legebiltzarkide Carmelo Barriok azaldu zuenez, «Alderdi Popularra bat dator legearekin; arazo handiena legearen izendapenarekin dugu».

EAJren aburuz, legea bizi-testamenturako babes juridikoa da. PSE-EEK, berriz, nork bere tratamenduari buruz erabakiak hartzeko aukera azpimarratu zuen.

EAKo kide Karmele Antxutegik legeak «gaixoen autonomia errespetatu eta pertsonen duintasuna babesten» duela esan zuen. Ezker Batuko kideak ere «pozik» agertu ziren legea onartu zelako.

Katalunia, Aragoi, Nafarroa eta Madril badiara dagoeneko antzeko legeak.